

六經同卷

長爪梵志請問經

佛說譬喻經

佛說比丘聽施經

佛說畧教誡經

當四

佛說療痔病經

佛說業報差別經

當四

長爪梵志請問經

唐三藏法師義淨奉 制譯

如是我聞一時薄伽梵在王舍城鷲峯山中
與大苾芻衆千二百五十人俱并餘苾芻苾
芻尼近事男近事女國王大臣沙門婆羅門
外道之類天龍藥叉人非人等瞻仰而住爾
時世尊爲說自證微妙之法所謂初中後善
文義巧妙純一圓滿清淨鮮白梵行之相爾
時有一長爪梵志來詣佛所策杖而立問云
喬答摩汝曾實作如是宣說世由自業業爲

能授業爲生處業爲親族業爲所依耶佛告
婆羅門我作是說世由自業業爲能授業爲
生處業爲親族業爲所依婆羅門問曰若如
是者沙門喬答摩先作何業令汝獲得金剛
不壞堅固之身佛告婆羅門我於前生遠離
殺害有情命根由彼業力今獲斯果沙門喬
答摩先作何業令汝獲得手指纖長網縵爲
相佛告婆羅門我於前生遠離偷盜他人財
物由彼業力今獲斯果沙門喬答摩先作何
業令汝獲得具足色力諸根圓滿佛告婆羅

門我於前生遠離女人欲邪行事由彼業力
今獲斯果沙門喬答摩先作何業令汝獲得
出廣長舌自覆其面佛告婆羅門我於前生
遠離妄語詭誑於人由彼業力今獲斯果沙
門喬答摩先作何業令汝獲得威儀庠序如
師子行佛告婆羅門我於前生遠離諸酒放
逸之處由彼業力今獲斯果沙門喬答摩先
作何業令汝獲得微妙相好莊嚴其身佛告
婆羅門我於前生遠離歌舞倡艷之事由彼
業力今獲斯果沙門喬答摩先作何業令汝

獲得上妙香氣芬馥其身佛告婆羅門我於
前生遠離香花瓔珞莊飾由彼業力今獲斯
果沙門喬答摩先作何業令汝獲得受用金
剛勝妙之座佛告婆羅門我於前生遠離高
牀大牀嬌恣之物由彼業力今獲斯果沙門
喬答摩先作何業令汝獲得四十牙齒鮮白
齊平佛告婆羅門我於前生遠離非時飲噉
諸食由彼業力今獲斯果沙門喬答摩先作
何業令汝獲得頂上肉髻圓滿姝好佛告婆
羅門我於前生於三寶二師沙門婆羅門

母尊長應恭敬處五輪著地以無慢心虔誠
致禮由彼業力今獲斯果時婆羅門見佛爲
說因果不虛白言喬答摩此名何福云何受
持佛言此名八支淨戒若能一日一夜或復
長從師受持獲果如是爾時長爪梵志旣於
佛所聞說八支音四日夜淨戒由先遠離鄙惡業
故便能獲得勝妙莊嚴深心信受歡喜踊躍
即於佛前捨高慢心投杖于地合掌恭敬禮
佛雙足白言世尊我今始知善惡之業感報
不虛我從今日乃至盡形歸依佛陀兩足中

尊乃至盡形歸依達摩離染中尊乃至盡形
歸依僧伽諸衆中尊我受八支近住淨戒始
從今時乃至明旦日出已來於其中間不害
一切命不盜他財物不婬不妄語飲酒放逸
處華莊及歌舞高大非時食我今悉遠離受
持淨八支第二第三亦如是說佛告婆羅門
善哉善哉如是應作如是應持爾時世尊說
是法已時婆羅門及苾芻衆諸人天等皆大
歡喜信受奉行
長爪梵志請問經

佛說譬喻經

唐三藏法師義淨奉 詔譯

如是我聞一時薄伽梵在室羅筏城逝多林
給孤獨園爾時世尊於大衆中告勝光王曰
大王我今爲王畧說譬喻諸有生死味著過
患王今諦聽善思念之乃往過去於無量劫
時有一人遊於曠野爲惡象所逐怖走無依
見一空井傍有樹根即尋根下潛身井中有
黑白二鼠互齧樹根於井四邊有四毒蛇欲
螫其人下有毒龍心畏龍蛇恐樹根斷樹有